

BOSNA I HERCEGOVINA
FEDERACIJA BOSNE I HERCEGOVINE
PARLAMENT FEDERACIJE
DOM NARODA
Broj: 02-02-422/21
Sarajevo, 4.3.2021. godine

Z A P I S N I K
**9. SJEDNICE DOMA NARODA PARLAMENTA FEDERACIJE BOSNE I
HERCEGOVINE, održane 18. 2. i 4.3.2021. godine**

Sjednica je počela sa radom u 12:24 sati.

Sjednicom je predsjedavao Tomislav Martinović, predsjedavajući Doma naroda Parlamenta Federacije Bosne i Hercegovine.

Predsjedavajući je pozdravio prisutne delegate te napomenuo da će sjednica biti održana pod posebnim epidemiološkim mjerama.

Izostanak sa sjednice su najavili: Dragana Damjanović, Drago Puzigaća, Tomislav Mandić, Amel Šahinović i Senad Alić.

Prema evidenciji Stručne službe sjednici prisustvuju 42 delegata što čini većinu pa Dom naroda može raditi i punovažno odlučivati.

Predsjedavajući je istakao da prije utvrđivanja dnevnog reda, na osnovu člana 104. Poslovnika o radu Doma naroda, delegati mogu postavljati delegatska pitanja ili pokretati inicijative.

Napomenuo je, također, da bi izlaganje delegatskih pitanja i inicijativa trebalo ograničiti na razumno vrijeme od tri minute.

Sladjan Ilić je postavio delegatsko pitanje u vezi finansiranja sigurnih kuća - Koliko je sredstava Federacija BiH izdvojila za namjenu finansiranja istih u 2020. godini? Zanimalo ga je i u kojoj je fazi donošenje revidiranog, odnosno novog Zakona o zaštiti nasilja u porodici koji bi, kako je rekao, na bolji i prihvatljiviji način definirao osnivače sigurnih kuća.

Ivan Ivić je uputio inicijativu Federalnom ministarstvu poljoprivrede, vodoprivrede i šumarstva za pomoć mljekarima, posebno proizvođačima sira koji su ostali bez pomoći Vlade Federacije po javnom pozivu za pomoć i ublažavanje djelovanja posljedica pandemije COVID-19.

Zvonko Marić je postavio pitanje Vladi Federacije BiH u vezi nabavke vakcina. Upitao je šta je sve Vlada poduzela u cilju nabavke vakcina i da li je uopšte sposobna da izvrši ovu nabavku uz napomenu da je cijeli region već poduzeo određene korake u cilju nabavke vakcina.

Također je istakao da postoji problem u vezi dostave odgovora na delegatska pitanja, jer, kako je rekao, dolazi do situacije da o njima moraju saznati iz drugih izvora, te je ponovo postavio pitanje u vezi primjene različitih kriterija na poslovne prostore u vlasništvu Vlade FBiH.

Aner Žuljević je uputio Inicijativu prema Kolegiju Doma naroda, a ona podrazumijeva da na prvoj narednoj sjednici Doma naroda kao tačke dnevnog reda budu razmatrani

Nacrt zakona o registru pedofila i Nacrt zakona o izmjeni Zakona o penzijsko-invalidskom osiguranju. Kazao je da se radi o zakonima koji su usvojeni prije više od šest mjeseci u Predstavničkom domu i da je, prema njegovom mišljenju, vrijeme da budu razmatrani i u Domu Naroda.

Boris Krešić je postavio dva delegatska pitanja.

Prvo je vezano za diskriminaciju vanbračnih partnera, te odgovornost za nerad kao i posljedice nerada pojedinih institucija u ovoj oblasti.

Drugo pitanje je postavio Federalnom ministarstvu pravde - Kada će se ponuditi zakonska rješenja u vezi sa Presudom Ustavnog suda FBiH U-22/16?

Sandra Imširović je postavila delegatsko pitanje JP Ceste FBiH - Kada se planira izvršiti popravka kolovoza i trupa magistralne ceste M-4 Tuzla - Doboј na dijelu koji prolazi kroz područje Općine Lukavac?

Segmedina Srna Bajramović postavila je pitanje u kojoj je fazi implementacija Zakona o liječenju neplodnosti biomedicinski potpomognutom oplodnjom, a koji je Dom naroda usvojio 6. 6.2018. godine?

Drugo pitanje je također postavila nadležnim u vezi implementacije Zakona koji se tiče transplantacija, a koji je usvojen 9.11.2017. godine.

Senad Ahmetović je postavio pitanje Vladi Federacije BiH u vezi nadležnosti u Federaciji BiH za kupovinu vakcina i vakcinaciju zdravstvenih radnika i građana koji to žele.

Iva Raguž je Federalnom ministarstvu rada i socijalne politike uputila Inicijativu za izmjenu Zakona o osnovama socijalne zaštite, zaštite civilnih žrtava rata i zaštite porodica s djecom Federacije BiH.

Zdenka Džambas je istakla da je već postavljala pitanje koje se odnosilo na to da li postoji registar svih doniranih sredstava koja su bila potrebna tokom pandemije.

Jasmin Duvnjak je istakao da je na prvoj sjednici Doma naroda pokrenuo Inicijativu vezanu za izmjene Zakona ili donošenje novog Zakona o pripadnosti javnih prihoda u FBiH, te zatražio od Vlade FBiH da u razumnom roku od šest mjeseci dostavi prijedlog novog zakona ili izmjene i dopune postojećeg Zakona oko finansija.

Drugu Inicijativu je uputio za donošenje Zakona o sportu, te je postavio pitanje Vladi Federacije BiH u pogledu rješavanja pitanja svojinske transformacije u sportu. Istakao je da očekuje od Vlade FBiH da u roku od šest mjeseci dostavi prijedlog akta

kojim će se normirati i predvidjeti mogućnost transformacije sportskih klubova, odnosno udruženja u sportska privredna društva.

Hadis Jusić uputio je pitanje Federalnom ministarstvu zdravstva, Federalnom štabu civilne zaštite i Federalnom kriznom štabu - Da li je sa područja USK ponuđena pomoć u nabavci neophodne medicinske opreme te da li je kantonima omogućeno da pružaju pomoć?

Marko Saraf je postavio pitanje Federalnom ministarstvu raseljenih osoba i izbjeglica u kojoj mjeri su realizirana sredstva u poticaju održivog povratka u Federaciji BiH i zatražio dostavu podataka odnosno rang-listu dodjele donacija za popravak stambenih jedinica u FBiH za 2020. godinu.

Vibor Handžić se nadovezao na Inicijativu Anera Žuljevića i uputio urgenciju da se što prije stave ove, u oktobru 2020. godine u Predstavničkom domu PFBiH usvojene, tačke na dnevni red sjednice Doma.

Potom se prešlo na glasanje o usvajanju Zapisnika sa 8. sjednice Doma naroda Parlamenta FBiH.

Na osnovu rezultata glasanja, predsjedavajući je konstatirao da je Dom naroda Parlamenta Federacije Bosne i Hercegovine jednoglasno bez primjedbi, sa 41 glasom za, bez glasova protiv i bez suzdržanih usvojio Zapisnik 8. sjednice Doma naroda Parlamenta Federacije Bosne i Hercegovine održane 30.decembra 2020. godine i 11. i 28. januara 2021. godine.

Prije prelaska na utvrđivanje dnevnog reda predsjedavajući je obavijestio delegate da je na sjednici Kolegija utvrđeno da postoji određen broj pitanja koja se pojavljuju, a koja bi trebalo uvrstiti u dnevni red.

Također je istakao da su na sjednici Kolegija razmatrana i pitanja koja su predmet sjednice, i istakao Zaključak Kolegija da se u okviru tačke 14. (Izbor i imenovanja) razmotri:

- a) Prijedlog odluke o dopuni Odluke o izboru predsjednika, zamjenika predsjednika i članova radnih tijela Doma naroda Parlamenta FBiH.

Predsjedavajući je kazao da će delegati prijedlog dobiti u pismenom obliku i da se odnosi na dopunu Komisije za evropske integracije u koju je naknadno imenovan, odnosno izabran predsjednik Kluba delegata srpskog naroda Slađan Ilić.

- b) Odluka o razrješenju i imenovanju članova Komisije za vrijednosne papire Federacije BiH

Prije otvaranja rasprave o predloženom dnevnom redu, predsjedavajući je naglasio da će inicijative iznesene u ime klubova biti uvrštene u dnevni red naredne sjednice Doma naroda.

Jasmin Duvnjak je u ime Kluba delegata bošnjačkog naroda iznio prijedlog da se dnevni red dopuni Informacijom o produženju važenja Srednjoročne strategije razvoja

poljoprivrednog sektora u FBiH za period od 2015.-2020. do kraja 2021. godine, u skladu sa Zaključkom Odbora za poljoprivredu, vodoprivredu i šumarstvo Doma naroda.

Naveo je da Klub delegata bošnjačkog naroda prihvata obrazloženje predsjedavajućeg da se Prijedlog zakona o izmjenama Zakona o finansijskoj konsolidaciji privrednih društava i Prijedlog Zakona o stečaju razmatraju na narednoj sjednici.

Predsjedavajući je upitao da li je predstavnik Odbora za poljoprivredu, vodoprivredu i šumarstvo Doma naroda prisutan da bi obrazložio navedenu Informaciju.

Ivan Ivić je obrazložio da se više radi o tehničkom pitanju Plana i Programa koje bi trebalo produžiti za godinu dana.

Slađan Ilić, predsjednik Kluba delegata srpskog naroda, je istakao da je tačka 14. Izbor i imenovanja oko izbora Komisije za vrijednosne papire bila u prijedlogu dnevnog reda 4. sjednice Doma naroda, te da je gospodin Stojanović tada, u ime Kluba delegata srpskog naroda, iznio jednoglasno stav Kluba da se po ovoj tački traži izjašnjenje po mehanizmu zaštite vitalnog nacionalnog interesa te istakao da ukoliko tačka bude na dnevnom redu ostaje identičan stav, odnosno da će biti zatraženo glasanje po mehanizmu zaštite vitalnog nacionalnog interesa.

Predsjedavajući je podsjetio delegata Slađana Ilića da se za takav postupak poslovnički moraju prethodno ispuniti preduvjeti, u smislu popisa delegata koji se mora dostaviti u pismenoj formi.

U vezi sa Informacijom o produženju važenja Srednjoročne strategije razvoja poljoprivrednog sektora u FBiH za period od 2015.-2020. do kraja 2021. godine delegat Ilija Ilić je istakao da je Odbor za poljoprivredu, vodoprivredu i šumarstvo Doma naroda Parlamenta Federacije BiH razmatrao istu. Predsjedavajući je istakao da je delegat Ivan Ivić već sve obrazložio.

Predsjednik Kluba srpskog naroda Slađan Ilić je prije usvajanja dnevnog reda zatražio pauzu od 15 minuta.

Boris Krešić je zahtijevao da se tačka 4. Prijedlog zakona o izmjenama Zakona o vrijednosnim papirima skine sa dnevnog reda zato što Predstavnički dom Parlamenta Federacije nije usvojio izmjene i dopune Zakona po hitnoj već po redovnoj proceduri. Također je istakao da je Presudom suda predsjedniku te Komisije zabranjen rad u Komisiji te zatražio kompromis glede imenovanja Komisije iz razloga što su kandidati već predloženi od strane Predstavničkog doma FBiH.

Predsjedavajući je istakao da je taj Prijedlog zakona uvršten u dnevni red kao jedno pomoćno prateće rješenje koje ima vremenski ograničen rok trajanja te istakao da će delegati imati mogućnost da se kroz glasanje očituju da li prihvataju proceduru u obliku u kojem je Vlada Federacije BiH predložila ili ne.

Predsjedavajući je zaključio raspravu i dao 15 minuta pauze kako bi Klub delegata srpskog naroda mogao održati svoju sjednicu.

Nakon pauze predsjedavajući je stavio na glasanje prijedlog Odbora za poljoprivredu, vodoprivredu i šumarstvo Doma naroda da se u dnevni red uvrsti Informacija o produženju važenja Srednjoročne strategije razvoja poljoprivrednog sektora u FBiH za period od 2015.-2020. do kraja 2021. godine.

Predsjedavajući je konstatirao da je ova Informacija sa 37 glasova za i tri suzdržana glasa uvrštena u dnevni red 9. sjednice Doma naroda.

Nakon toga predsjedavajući je stavio na glasanje prijedlog delegata Krešića da se sa dnevnog reda skine Prijedlog zakona o dopuni Zakona o Komisiji za vrijednosne papire.

Na osnovu rezultata glasanja predsjedavajući je konstatovao da je ovaj prijedlog dobio potrebnu većinu, sa 25 glasova za, 11 protiv i četiri suzdržana, te istakao da se glasanje obavlja u skladu sa članom 105. Poslovnika, prema kojem je potrebna većina od prisutnih, a da trenutno sjednici prisustvuje 41 delegat.

Predsjedavajući je potom stavio na glasanje Prijedlog zakona o Jedinostvenom registru taksi i naknada u FBiH s prijedlogom da se razmatra po skraćenom postupku, i konstatovao da je prijedlog dobio potrebnu većinu sa 29 glasova za, četiri protiv i četiri suzdržana glasa.

Predsjedavajući je istakao prijedlog Kolegija Doma naroda da se u okviru tačke 2. predloženog dnevnog reda uvrsti Informacija o epidemiološkoj situaciji COVID-19 u FBiH i na dan 8. 2.2021.

Predsjedavajući je konstatirao da je prijedlog dobio potrebnu većinu sa 37 glasova za i tri suzdržana glasa.

Predsjedavajući je zatim stavio na glasanje prijedlog Kolegija Doma naroda da se u okviru tačke 14. Izbori i imenovanje predloženog dnevnog reda razmatraju pod:

- a) Prijedlog odluke o dopuni Odluke o izboru predsjednika, zamjenika predsjednika i članova radnih tijela Doma naroda Parlamenta FBiH;
- b) Odluka o razrješenju i imenovanju članova Komisije za vrijednosne papire.

Predsjedavajući je konstatovao da je ovaj prijedlog Kolegija dobio potrebnu većinu sa 35 glasova za i tri glasa protiv.

Potom je za sjednicu predložio sljedeći:

DNEVNI RED

1. Prijedlog zaključka koji proizilazi iz Odluke Ustavnog suda Bosne i Hercegovine, broj: AP-3683/20 od 22.12. 2020. godine,

2. a) Informacija o epidemiološkoj situaciji COVID - 19 u Federaciji Bosne i Hercegovine na dan 25.1.2021. godine,
 - b) Informacija o epidemiološkoj situaciji COVID - 19 u Federaciji Bosne i Hercegovine na dan 8.2.2021. godine s prijedlogom naredbi i preporuka Kriznog štaba Federalnog ministarstva zdravstva,
3. Informacija o Planu vakcinacije protiv COVID-19 u Federaciji Bosne i Hercegovine,
4. Prijedlog zakona o Jedinstvenom registru taksi i naknada u Federaciji Bosne i Hercegovine - skraćeni postupak,
5. Nacrt zakona o zaštiti zraka,
6. Nacrt zakona o izmjenama i dopunama Zakona o prodaji stanova na kojima postoji stanarsko pravo,
7. Nacrt zakona o izmjenama i dopunama Zakona o principima lokalne samouprave u Federaciji Bosne i Hercegovine,
8. Nacrt zakona o poduzetničkoj infrastrukturi u Federaciji Bosne i Hercegovine,
9. Nacrt zakona o slobodnim zonama u Federaciji Bosne i Hercegovine,
10. Informacija o produženju važenja Srednjoročne strategije razvoja poljoprivrednog sektora u Federaciji Bosne i Hercegovine za period 2015. - 2020. godina do kraja 2021. godine,
11. Kvartalni izvještaj o dugu Q4/2019,
12. Izvještaj o zaduženju Federacije Bosne i Hercegovine po osnovu emisije trezorskih zapisa (6M) na dan 19.5.2020. godine,
13. Izvještaj o zaduženju Federacije Bosne i Hercegovine po osnovu emisije (5Y) obveznica na dan 23.6.2020. godine,
14. Izbori i imenovanja:
 - a) Prijedlog odluke o dopuni Odluke o izboru predsjednika, zamjenika predsjednika i članova radnih tijela Doma naroda Parlamenta Federacije Bosne i Hercegovine,

b) Odluka o razrješenju i imenovanju članova Komisije za vrijednosne papire Federacije Bosne i Hercegovine.

Predsjedavajući je konstatovao da je predloženi dnevni red dobio potrebnu većinu sa 38 glasova za, jednim glasom protiv i tri suzdržana glasa.

1. Prijedlog zaključka koji proizilazi iz Odluke Ustavnog suda Bosne i Hercegovine, broj: AP -3683/20 od 22.12. 2020. godine

Ustavni sud BiH je dostavio Parlamentu Federacije BiH ovu Odluku od 22.12.2020.

Predstavnički dom Parlamenta Federacije BiH je obavijestio Dom naroda da je na 18.sjednici održanoj 26.1.2021. razmatrao Odluku Ustavnog suda i pri tome usvojio Zaključak.

U raspravi nije niko učestvovao.

Predsjedavajući je stavio na glasanje sljedeći:

ZAKLJUČAK

Zadužuje se premijer Federacije BiH da u skladu sa Ustavom Federacije BiH osigura izvršenje Odluke Ustavnog suda BiH broj: AP-3683/20 od 22.12. 2020. godine.

Na osnovu rezultata glasanja, predsjedavajući je konstatovao da je Zaključak dobio potrebnu većinu sa 35 glasova za, bez glasova protiv i uz dva suzdržana glasa.

2. a) Informacija o epidemiološkoj situaciji COVID - 19 u Federaciji Bosne i Hercegovine na dan 25.1.2021. godine,

b) Informacija o epidemiološkoj situaciji COVID - 19 u Federaciji Bosne i Hercegovine na dan 8.2.2021. godine s prijedlogom naredbi i preporuka Kriznog štaba Federalnog ministarstva zdravstva.

3. Informacija o Planu vakcinacije protiv COVID-19 u Federaciji Bosne i Hercegovine

Vlada Federacije BiH je dostavila Informaciju o epidemiološkoj situaciji na dan 25.1.2021. godine i na dan 8.2.2021. godine s prijedlogom naredbi i preporuka Kriznog štaba Federalnog ministarstva zdravstva.

Naknadno Vlada Federacije je dostavila Informaciju o realizaciji Zaključka V. broj: 83/2021.godine od 14.1.2021.godine pod tačkom 5., koja se odnosi Izmjene i dopunu Plana vakcinacije protiv COVIDA-19 u Federaciji Bosne i Hercegovine.

Informaciju su razmatrala nadležna radna tijela.

Predsjednik Kluba delegata hrvatskog naroda Ivo Tadić je predložio da se za tačke 2. i 3. vodi jedinstvena diskusija, a da se o njima pojedinačno izjašnjavaju.

Predsjedavajući se složio sa prijedlogom delegati Ive Tadića i konstatovao da su delegati prihvatili da se vodi objedinjena rasprava po tačkama 2. i 3. dnevnog reda.

Informaciju su obrazložili voditelj Službe za epidemiologiju u Zavodu za javno zdravstvo Federacije BiH Sanjin Musa, sekretarka Federalnog ministarstva zdravstva Snježana Bodnaruk, ministrica turizma i zaštite okoliša Edita Đapo i ministrica finansija Jelka Milićević.

Predsjedavajući je prije nastavka rasprave pozdravio federalnu ministricu turizma i zaštite okoliša, potpredsjednicu Vlade Federacije, federalnog ministra poljoprivrede, vodoprivrede i šumarstva i federalnog ministra razvoja, poduzetništva i obrta.

Predsjedavajući je pozdravio i premijera Federacije BiH gospodina Novalića koji je prisutan na sjednici.

Informacije su pojasnili i Stipe Buljan, sekretar Federalnog ministarstva energije, rudarstva i industrije i Šemsudin Dedić, federalni ministar poljoprivrede, vodoprivrede i šumarstva.

Predsjedavajući je nakon toga otvorio raspravu.

U raspravi su učestvovali Damir Marjanović, Zvonko Marić, Damir Džeba, Ilija Nakić, Vibor Handžić, Ivo Tadić, Vesna Saradžić i Aner Žuljević.

Delegatima je odgovore na pitanja dala Snježana Bodnaruk.

Predsjedavajući je, nakon rasprave, konstatovao da je Dom naroda primio k znanju Informaciju o epidemiološkoj situaciji COVID-19 u Federaciji BiH na dan 25.1.2021. godine i Informaciju o epidemiološkoj situaciji COVID - 19 u Federaciji Bosne i Hercegovine na dan 8.2.2021. godine s prijedlogom naredbi i preporuka Kriznog štaba Federalnog ministarstva zdravstva.

Predsjedavajući je također konstatovao da je i Informacija o Planu vakcinacije protiv COVID-19 u Federaciji Bosne i Hercegovine primljena k znanju.

4. Prijedlog zakona o Jedinственom registru taksi i naknada u Federaciji Bosne i Hercegovine - skraćeni postupak

Prijedlog zakona utvrdila je Vlada Federacije BiH.

Predstavnički dom Parlamenta Federacije BiH je na 12. sjednici održanoj 23.6.2020. godine usvojio Prijedlog zakona o Jedinственom registru taksi i naknada u Federaciji Bosne i Hercegovine u tekstu kako ga je predložila Vlada Federacije BiH.

Prijedlog zakona su razmatrala i nadležna radna tijela i dostavila svoje izvještaje. Prijedlog zakona je obrazložila Jelka Milićević, ministrica finansija.

U raspravi niko nije učestvovao.

Na osnovu rezultata glasanja predsjedavajući je konstatovao da je Dom naroda sa 38 glasova za, jednim glasom protiv i bez suzdržanih glasova, usvojio Prijedlog zakona o Jedinostvenom registru taksi i naknada u Federaciji Bosne i Hercegovine.

5. Nacrt zakona o zaštiti zraka

Tekst Nacrta zakona utvrdila je Vlada Federacije BiH.

Predstavnički dom Parlamenta Federacije BiH je na 4. sjednici održanoj 10. i 11.9.2019. godine razmatrao Nacrt ovog zakona i Zaključkom ga prihvatio te je Nacrt zakona stavljen na javnu raspravu.

Nacrt zakona su razmatra nadležna radna tijela i dostavila svoje izvještaje.

Nacrt zakona obrazložila je Edita Đapo, ministrica turizma i zaštite okoliša.

U raspravi su učestvovali Segmedina Srna Bajramović i Aner Žuljević.

Predsjedavajući je stavio na glasanje sljedeći:

Z A K L J U Č A K

1. Dom naroda Parlamenta Federacije BiH prihvata Nacrt zakona o zaštiti zraka i smatra da može poslužiti kao osnova za izradu Prijedloga zakona.
2. Zadužuje se Vlada Federacije da organizira i provede javnu raspravu u trajanju od 60 dana.
3. U skladu sa procedurama predviđenim Ustavom Federacije BiH za donošenje Zakona i zajedničke nadležnosti federalne i kantonalne vlasti zadužuje se Stručna služba Doma naroda Parlamenta Federacije BiH da ovaj Zaključak i Nacrt zakona o zaštiti zraka dostavi kantonalnim skupštinama na davanje mišljenja u roku od 60 dana.
4. Zadužuje se predlagač da prilikom izrade Prijedloga zakona ima u vidu primjedbu, prijedloge i sugestije iznesene na sjednici Doma naroda i one iznesene na javnoj raspravi.

Na osnovu rezultata glasanja, predsjedavajući je konstatovao da je Zaključak prihvaćen sa 40 glasova.

Prije prelaska na 6. tačku dnevnog reda predsjedavajući je dao pauzu od 10 minuta.

6. Nacrt zakona o izmjenama i dopunama Zakona o prodaji stanova na kojima postoji stanarsko pravo

Nacrt zakona utvrdila je Vlada Federacije BiH.

Predstavnički dom Parlamenta Federacije BiH je na 12. sjednici održanoj 23.6.2020. godine razmatrao Nacrt ovog zakona i Zaključkom ga prihvatio.

Nacrt zakona su razmatrala nadležna radna tijela.

Nacrt zakona obrazložio je Hamid Suljović, pomoćnik federalnog ministra prostornog uređenja.

U raspravi su učestvovali Ivo Tadić, Ivan Ivić, Zdenka Džambas, Ilija Nakić, Aner Žuljević i Jasmin Duvnjak.

Predsjedavajući je potom, na zahtjev predsjednika Kluba delegata bošnjačkog naroda Jasmina Duvnjaka, dao pauzu od 15 minuta.

Predsjedavajući je konstatovao da je okončana rasprava i stavio na glasanje sljedeći:

ZAKLJUČAK

1. Dom naroda Parlamenta Federacije BiH prihvata Nacrt zakona o izmjenama i dopunama Zakona o prodaji stanova na kojima postoji stanarsko pravo i smatra da može poslužiti kao dobar osnov za izradu Prijedloga zakona.
2. Zadužuje se predlagatelj da organizira i provede javnu raspravu u trajanju od 60 dana.
3. Zadužuje se Vlada Federacije da prilikom izrade prijedloga zakona ima u vidu primjedbe, prijedloge i sugestije iznesene na sjednici Doma.

Na osnovu rezultata glasanja, predsjedavajući je konstatovao da prijedlog zaključka nije dobio potrebnu većinu sa 21 glasom za, dva protiv i 12 suzdržanih.

Predsjednik Kluba delegata bošnjačkog naroda Jasmin Duvnjak zatražio je pojedinačno izjašnjavanje.

Sekretar Doma naroda Izmir Hadžić je u skladu sa članom 113. Poslovnika o radu Doma naroda izvršio pojedinačno izjašnjavanje te, prema rezultatima izjašnjavanja, konstatovao da je 21 delegat glasao za, tri protiv, a 12 delegata je bilo suzdržano.

Predsjedavajući je zatim konstatovao da zaključak nije dobio potrebnu većinu.

7. Nacrt zakona o izmjenama i dopunama Zakona o principima lokalne samouprave u Federaciji Bosne i Hercegovine,

Nacrt zakona obrazložio je Enver Išerić, direktor Zavoda za javnu upravu.

Nacrt zakona su razmatrala nadležna radna tijela.

U raspravi su učestvovali Senad Čeljo i Alisa Hajdarević.

Predsjedavajući je stavio na glasanje sljedeći:

ZAKLJUČAK

1. Dom naroda Parlamenta Federacije Bosne i Hercegovine prihvata Nacrt zakona o izmjenama i dopunama Zakona o principima lokalne samouprave u Federaciji Bosne i Hercegovine i smatra da može poslužiti kao osnov za izradu Prijedloga zakona.
2. Zadužuje se predlagač da organizira i provede javnu raspravu u trajanju od 60 dana.
3. Zadužuje se Stručna služba Doma naroda Parlamenta Federacije Bosne i Hercegovine da ovaj Zaključak i Nacrt zakona o izmjenama i dopunama Zakona o principima lokalne samouprave u Federaciji Bosne i Hercegovine dostavi kantonalnim skupštinama radi davanja mišljenja u roku od 60 dana.
4. Zadužuje se predlagač da prilikom izrade Prijedloga zakona, ima u vidu primjedbe, prijedloge i sugestije iznesene na sjednici Doma naroda.

Na osnovu rezultata glasanja, predsjedavajući je konstatovao da je ovaj zaključak prihvaćen sa 35 glasova za, bez glasova protiv i bez suzdržanih.

Predsjedavajući je potom, u dogovoru sa predsjednicima klubova, predložio da prekinu sjednicu.

Sjednica je prekinuta u 17:41 sati.

* * *

Transkript sjednice čini sastavni dio Zapisnika.

NASTAVAK SJEDNICE OD 4. 3. 2021. godine

Sjednica je počela sa radom u 13:17 sati.

Sjednicom je predsjedavao Tomislav Martinović, predsjedavajući Doma naroda Parlamenta Federacije Bosne i Hercegovine.

Predsjedavajući je pozdravio prisutne delegate, ministre u Vladi Federacije Bosne i Hercegovine te potpredsjednicu Vlade FBiH.

Izostanak sa današnje sjednice su najavili sljedeći delegati: Goran Broćeta, Nikica Bosnić, Senad Čeljo, Senad Ahmetović, Aljoša Čampara, Dževad Hodžić, Daliborka Milović, Aleksandar Štrbac, Edin Fejzić, Drago Puzigaća, Segmedina Srna Bajramović i Aner Žuljević.

Predsjedavajući je istakao da prema evidenciji Stručne službe sjednici prisustvuje 35 delegata što čini većinu, pa Dom naroda može raditi i punovažno odlučivati.

Za nastavak sjednice preostale su sljedeće tačke dnevnog reda:

8. Nacrt zakona o poduzetničkoj infrastrukturi u Federaciji Bosne i Hercegovine,
9. Nacrt zakona o slobodnim zonama u Federaciji Bosne i Hercegovine,
10. Informacija o produženju važenja Srednjoročne strategije razvoja poljoprivrednog sektora u Federaciji Bosne i Hercegovine za period 2015. - 2020. godina do kraja 2021. godine,
11. Kvartalni izvještaj o dugu Q4/2019,
12. Izvještaj o zaduženju Federacije Bosne i Hercegovine po osnovu emisije trezorskih zapisa (6M) na dan 19.5.2020. godine,
13. Izvještaj o zaduženju Federacije Bosne i Hercegovine po osnovu emisije (5Y) obveznica na dan 23.6.2020. godine,
14. Izbori i imenovanja:
 - a) Prijedlog odluke o dopuni Odluke o izboru predsjednika, zamjenika predsjednika i članova radnih tijela Doma naroda Parlamenta Federacije Bosne i Hercegovine,
 - b) Odluka o razrješenju i imenovanju članova Komisije za vrijednosne papire Federacije Bosne i Hercegovine.

8. Nacrt zakona o poduzetničkoj infrastrukturi u Federaciji Bosne i Hercegovine

Nacrt zakona utvrdila je Vlada Federacije.

Predstavnički dom je na 16. sjednici održanoj 2.12.2020. godine razmatrao Nacrt ovog Zakona i Zaključkom ga prihvatio.

Nacrt zakona obrazložio je ministar razvoja, poduzetništva i obrta Amir Zukić.

U raspravi niko nije učestvovao.

Predsjedavajući je stavio na glasanje sljedeći:

ZAKLJUČAK

1. Dom naroda Parlamenta Federacije BiH prihvata Nacrt zakona o poduzetničkoj infrastrukturi u Federaciji BiH i smatra da može poslužiti kao osnov za izradu prijedloga zakona.
2. Zadužuje se predlagač da organizira i provede javnu raspravu u trajanju od 30 dana.
3. Zadužuje se Vlada Federacije da prilikom izrade prijedloga zakona ima u vidu primjedbe, prijedloge i sugestije iznesene u javnoj raspravi.

Predsjedavajući je konstatovao da je ovaj Zaključak dobio potrebnu većinu jer je za glasalo 34 delegata.

9. Nacrt zakona o slobodnim zonama u Federaciji Bosne i Hercegovine

Tekst Nacrta zakona utvrdila je Vlada FBiH.

Predstavnički dom je 29. vanrednoj sjednici održanoj 22.5.2018. godine razmatrao Nacrt ovog zakona i Zaključkom ga prihvatio.

Nacrt zakona obrazložio je federalni ministar trgovine Zlatan Vujanović.

U raspravi niko nije učestvovao.

Presjedavajući je potom stavio na glasanje sljedeći:

ZAKLJUČAK

1. Dom naroda Parlamenta Federacije BiH prihvata Nacrt zakona o slobodnim zonama u Federaciji BiH i smatra da može poslužiti kao osnov za izradu prijedloga zakona.
2. Zadužuje se Vlada Federacije da prilikom izrade prijedloga zakona ima u vidu primjedbe, prijedloge i sugestije podnijete na ovaj tekst Nacrta zakona.

Na osnovu rezultata glasanja predsjedavajući je konstatovao da je ovaj Zaključak dobio potrebnu većinu sa 37 glasova za, bez glasova protiv i bez suzdržanih.

10. Informacija o produženju važenja Srednjoročne strategije razvoja poljoprivrednog sektora u Federaciji Bosne i Hercegovine za period 2015. - 2020. godina do kraja 2021. godine

Vlada Federacije BiH je dostavila ovu Informaciju koja se odnosi na produženje važenja Srednjoročne strategije razvoja poljoprivrednog sektora radi informiranja ovog Doma.

Predsjedavajući je konstatovao da nema predstavnika Vlade Federacije BiH.

Ministrica finansija Jelka Milićević kratko je obrazložila Informaciju uz napomenu da ukoliko Dom naroda treba dodatna obrazloženja skine tačku s dnevnog reda.

Delegat Vibor Handžić je istakao da u slučaju da predlagač nije prisutan, kako za ovu tako i za svaku tačku dnevnog reda, takav materijal ne treba uopće ni razmatrati, nego odmah povući s dnevnog reda.

Predsjedavajući je konstatovao da će se, s obzirom da nema predlagača, ova tačka preskočiti.

11. Kvartalni izvještaj o dugu Q4/2019

12. Izvještaj o zaduženju Federacije Bosne i Hercegovine po osnovu emisije trezorskih zapisa (6M) na dan 19.05.2020. godine

13. Izvještaj o zaduženju Federacije Bosne i Hercegovine po osnovu emisije (5Y) obveznica na dan 23.06.2020. godine

Predsjedavajući je predložio da se za ove tri tačke daju obrazloženja.

Vlada Federacije BiH je dostavila radi informiranja Parlamentu Federacije BiH Kvartalni izvještaj o dugu Q4/2019.

Predstavnički dom je obavijestio Dom naroda da je na 14. sjednici održanoj 15.10.2020. primio k znanju Kvartalni izvještaj o dugu Q4/2019.

Vlada Federacije BiH je također dostavila Parlamentu Federacije BiH Izvještaj o zaduženju Federacije BiH po osnovu emisije trezorskih zapisa (6M) na dan 19.5.2020. godine.

Predstavnički dom je na 13. sjednici održanoj 15.9.2020. godine primio k znanju Izvještaj o zaduženju Federacije BiH po osnovu emisije trezorskih zapisa (6M) na dan 19.5.2020. godine.

Vlada Federacije BiH je također, radi informiranja, dostavila Parlamentu FBiH Izvještaj o zaduženju FBiH po osnovu emisije (5Y) obveznica na dan 23.6.2020. godine.

Predstavnički dom je na 14. sjednici održanoj 15.10.2020. godine primio k znanju Izvještaj o zaduženju po osnovu emisije (5Y) obveznica na dan 23.6.2020. godine.

Izvještaje je obrazložila ministrica finansija i potpredsjednica Vlade Federacije BiH Jelka Milićević.

U raspravi niko nije učestvovao.

Predsjedavajući je konstatovao da je Dom naroda Parlamenta Federacije BiH primio k znanju Kvartalni izvještaj o dugu Q4/2019, Izvještaj o zaduženju Federacije Bosne i Hercegovine po osnovu emisije trezorskih zapisa (6M) na dan 19.5.2020. godine i Izvještaj o zaduženju Federacije Bosne i Hercegovine po osnovu emisije (5Y) obveznica na dan 23.6.2020. godine.

14. Izbori i imenovanja:

a) Prijedlog odluke o dopuni Odluke o izboru predsjednika, zamjenika predsjednika i članova radnih tijela Doma naroda Parlamenta Federacije Bosne i Hercegovine

Prijedlog odluke utvrdila je Komisija za izbor i imenovanja na prijedlog Komisije za europske integracije Doma naroda.

Prijedlog odluke je obrazložio Tomislav Mandić, predsjednik Komisije za izbor i imenovanja Doma naroda.

U raspravi niko nije učestvovao.

Predsjedavajući je konstatovao da je Prijedlog ove odluke dobio potrebnu većinu jer je za glasalo 35 delegata.

b) Odluka o razrješenju i imenovanju članova Komisije za vrijednosne papire Federacije Bosne i Hercegovine

Predsjedavajući je istakao da je u skladu sa članom 5. stav 1. Zakona o Komisiji za vrijednosne papire Federacije BiH, predsjednik Federacije BiH uz saglasnost potpredsjednika i potpredsjednice Federacije BiH, donio Odluku o razrješenju i imenovanju članova Komisije za vrijednosne papire i dostavio ih Parlamentu na utvđivanje.

Predstavnički dom Parlamenta Federacije BiH je na 9. sjednici održanoj 18.12.2019. godine donio Odluku o potvrđivanju Odluke o razrješenju i imenovanju članova Komisije za vrijednosne papire Federacije BiH.

Predsjedavajući je podsjetio delegate da je na početku 9. sjednice, u ime Kluba srpskih delegata zatražena pauza kako bi se održala sjednica Kluba srpskih delegata

jer je bilo najava da bi se o ovom pitanju glasalo po principu vitalnog nacionalnog interesa.

Potom je pozvao predsjednika Kluba da obavijesti Dom naroda da li je skupio potrebnih 12 potpisa čime bi dokazao da postoji interes Kluba srpskog naroda da se ovo pitanje tretira po principu vitalnog nacionalnog interesa.

Slađan Ilić, predsjednik Kluba delegata srpskog naroda, je istakao da je Klub donio stav da će biti suzdržani po ovoj tački dnevnog reda, te konstatovao da su samo prisutni članovi glasali i da ih je bilo 11.

Predsjedavajući je potom pozvao predsjednika Komisije za izbor i imenovanja Tomislava Mandića, da obrazloži ovu Odluku.

Predsjednik Komisije za izbor i imenovanja je izjavio da nije bilo rasprave u vezi ove tačke jer na sjednici Komisije nije bilo kvoruma.

Predsjedavajući je istakao da je Predsjednik Federacije BiH, gospodin Marinko Čavara, dostavio Odluku o razrješenju i imenovanju članova Komisije za vrijednosne papire Federacije BiH, u tekstu kako slijedi:

1. Zbog isteka mandata za koji su imenovani razrješuju se s dužnosti članovi Komisije za vrijednosne papire Federacije BiH.

1. Hasan Čelam, predsjednik
2. Milorad Rajlić, član
3. Matej Živković, član

2. Za članove Komisije za vrijednosne papire Federacije BiH imenuju se:

1. Esad Dželilović, predsjednik
2. Matej Živković, zamjenik predsjednika
3. Amir Ibrović, član
4. Adnan Zukić, član
5. Romeo Zelenika, član

3. Ova Odluka stupa na snagu dana potvrde u Parlamentu Federacije BiH.

4. Ova Odluka će se objaviti u Službenim novinama Federacije BiH.

U raspravi su učestvovali Vitor Handžić, Jasmin Duvnjak, Tomislav Martinović, Ivo Tadić, Igor Stojanović, Slađan Ilić, Žarko Vujović, Zdenka Džambas.

Predsjedavajući je konstatovao da Prijedlog ove odluke nije dobio potrebnu većinu jer je za glasao 21 delegat, tri su bila protiv, a osam delegata je bilo suzdržano.

Sjednica je završila sa radom u 14:49 sati.

* * *

Transkript sjednice čini sastavni dio Zapisnika.

SEKRETAR
Izmir Hadživdić

PREDSJEDAVAJUĆI
Tomislav Martinović